

# **ORDENANZAS FISCAIS ANO 2009**

## **ORDENANZA MUNICIPAL REGULADORA DA LICENCIA POLA TENENCIA DE ANIMAIS POTENCIALMENTE PERIGOSOS, SO SEU REXISTRO E DO REXISTRO DE ANIMAIS DE COMPAÑÍA.**

### **EXPOSICIÓN DE MOTIVOS –**

A Lei 50/1999 de 23 de decembro dictada ó amparo do art. 149.1.29 da CE que atribúe ó Estado as competencias en materia de seguridade pública, asigna no art. 3º ós Concellos a competencia para conceder a licenza administrativa que habilite para a tenencia de animais potencialmente perigosos. Ademais no seu art. 6 establece que en cada Concello existirá un rexistro de animais potencialmente perigosos.

A lei 1/1993, de 13 de abril da Comunidade Autónoma de Galicia de protección de animais domésticos e salvaxes en cativeiro impón a súa vez ós Concellos a obriga de recollida dos animais abandonados e no art. 27 do Decreto 1537/1998 que a desenrola obriga a censar a nivel municipal a tódolos animais da especie canina.

A Comunidade Autónoma de Galicia desenrola ambas leis de forma harmónica no Decreto 90/2002 . En consecuencia e de conformidade coas disposicións citadas e o amparo da Lei reguladora das Bases de réxime local a Corporación Municipal aproba a seguinte ordenanza:

### **CAPÍTULO I - DISPOSICIÓNS XERAIS**

#### **ART. 1º - OBXECTO**

1.- E obxecto da presente ordenanza a regulación da concesión e renovación das licencias administrativas para a tenencia de calesquera animais clasificados como potencialmente perigosos, ós que se refire o Decreto 90/2002, de 28 de febreiro, polo que se regula a tenencia de animais potencialmente perigosos e a inscrición na sección local do rexistro galego de animais de compañía e a renovación das licencias e inscricións indicadas.

2.- Quedan excluídos da aplicación da presente ordenanza os cans e animais pertencentes as Forzas Armadas, Forzas e Corpos de Seguridade do Estado, Corpos da Policía das Comunidades Autónomas, Policía Local e as empresas de seguridade con autorización oficial.

#### **ART. 2º - DEFINICIÓN DE ANIMAL POTENCIALMENTE PERIGOSO**

1.- Se consideran animais potencialmente perigosos, tódolos que pertencendo á fauna salvaxe, sendo utilizados como animais domésticos, ou de compañía, con

independencia da súa agresividade, pertencen a especies ou razas que teñan capacidade de causa-la morte ou lesións ás persoas ou a outros animais e danos as cousas.

2.- En particular terán a calificación de potencialmente perigosos, os animais domésticos ou de compañía que regulamentariamente se determinen pola Comunidade Autónoma de Galicia, en particular os pertencentes á especie canina definidos no art. 2.2 do Decreto 90/2002 de 28 de febreiro, polo que se regula a tenencia de animais potencialmente perigosos na Comunidade Autónoma de Galicia e se crean os rexistros galegos de identificación de animais de compañía e potencialmente perigosos e de adestradores caninos.

3.- En todo caso aqueles cans que manifesten unha marcada agresividade natural ou inducida mediante adestramento, malos tratos ou calquera outro medio. Esta agresividade será apreciada pola autoridade competente, de oficio ou previa notificación ou denuncia, e despois dun informe dun adestrados ou veterinario designado ó efecto.

## **CAPÍTULO II - DA LICENCIA MUNICIPAL**

### **ART. 3º - LICENCIA MUNICIPAL**

1.- A tenencia no municipio de animais clasificados como potencialmente perigosos requirirá a obtención, con carácter previo á adquisición do animal, da correspondente licencia municipal.

2.- Están obrigados á obtención da licencia municipal para a tenencia de animais clasificados como potencialmente perigosos os propietarios ou tenedores dos mesmos incluídos no Padrón de Habitantes, así como os establecementos ou asociacións, con sede neste municipio, que alberguen animais potencialmente perigosos ós que se refire o Decreto 90/2002 de 28 de febreiro da Comunidade Autónoma Galega e se dediquen a súa explotación, cría, comercialización, ou adestramento, incluídos os centros de adestramento, criaderos, centro de recollida, residencia, centros recreativos e establecementos de venda colocados neste municipio.

3.- Os propietarios de animais potencialmente perigoso non aveciñados neste municipio deberán acreditar, cando se atopen residindo temporalmente no mesmo e mentres permañeza o animal no termo municipal, a tenencia da licencia no municipio de orixe.

4.- Nos casos de inscrición de animais como consecuencia de haber efectuado anteriores ataques a persoas, animais ou cousas, no Concello, unha vez coñecida a resolución ou sentenza, de oficio ou a instancia de calquera interesado directo, a previa tramitación do expediente administrativo con audiencia ó interesado, requirirá ó propietario mediante resolución do Alcalde, ó obxecto de que no prazo dun mes proceda á solicitude da licencia, efectuándose en caso contrario a retirada e depósito do animal de conformidade co establecido no art. 9 desta ordenanza.

## **ART. 4º - REQUISITOS PARA A OBTENCIÓN DA LICENCIA**

1.- Para a obtención da licenza administrativa con destino á tenencia de calesquera animais clasificados como potencialmente perigosos será necesario o cumprimento dos seguintes requisitos:

- a) ser maior de idade e non estar incapacitado para proporcionar os coidados necesarios ó animal.
- b) non ter sido condenados por delitos de homicidio, lesións, torturas contra a liberdade ou contra a integridade moral a liberdade sexual e a saúde pública, de asociación con banda armada ou narcotráfico, así como non estar privado por resolución xudicial do dereito a tenencia de animais potencialmente perigosos.
- c) non ter sido sancionado por infraccións graves ou moi graves con algunha das sancións accesorias das previstas no apartado 3. do art. 13 da lei 50/1999 de 23 de decembro sobre o réxime xurídico de animais potencialmente perigosos. Non obstante, non será impedimento para a obtención ou, no seu caso, renovación, da licenza, ter sido sancionado coa suspensión temporal da mesma, sempre que, no momento da solicitude, a sanción de suspensión anteriormente imposta fora cumprida íntegramente.
- d) dispor de certificado de aptitude psicolóxica e de capacidade física para a tenencia de animais potencialmente perigosos.
- e) acreditar a formalización dun seguro de responsabilidade civil por danos a terceiros que podan causar os seus animais na contía mínima de 125.000 €

2.- Os requisitos esixidos deberán manterse vixentes durante todo o período da tenencia do animal; a perda dos mesmos dará lugar á revisión da licenza nos termos recollidos no art 9 desta ordenanza.

## **ART. 5º - VIXENCIA DAS LICENCIAS**

1.- As licencias terán unha vixencia de cinco anos, á finalización da que deberán ser obxecto de renovación, debendo acreditarse en cada exercicio para o seu mantemento:

- A) a suscripción do seguro de responsabilidade civil por danos a terceiros
- B) a expedición do certificado de sanidade animal, expedido por autoridade competente, que acredite con periodicidade anual a situación sanitaria do animal e a inexistencia de enfermidades ou trastornos que os fagan especialmente perigosos.

2.- A condena por calesquera delitos recollidos ó apartado b) do art.anterior dará lugar á revisión da licenza polo Concello.

## **ART. 6º.- ACREDITACIÓN**

1.- A identificación da tenencia da licenza municipal de animais potencialmente perigosos acreditarase mediante a entrega de certificación relativa á mesma.

2.- Por cada can que se posúa expedirse unha tarxeta identificativa na que se fará constar os seguintes datos:

- nº de licenza municipal
- código de identificación do can
- raza
- titular da licenza e DNI
- nº de rexistro municipal

No dorso se farán constar as persoas autorizadas polo titular da licenza para uso temporal e transporte do animal.

## **ART. 7º - DOCUMENTACIÓN**

1.- Para a expedición da tarxeta identificativa de cada can requirirase a aportación dos seguintes datos:

- raza e sexo do animal
- ano de nacemento
- domicilio habitual do animal
- especificación se está destinado a convivir con seres humanos ou se pola contra ten dificultades distintas como a garda, protección ou outra que se indique
- nome do propietario
- domicilio do propietario
- DNI do propietario
- nome ou razón social e domicilio do vendedor ou cedente
- póliza de seguro de responsabilidade civil
- certificado de aptitude psicolóxica e física nos termos recollidos nos arts. 4 e 5 do RD 287/2002 de 22 de marzo
- certificado de penais
- certificado de sanidade animal expedido por autoridade competente que acredite, con periodicidade anual a situación sanitaria do animal e a inexistencia de enfermidades ou trastornos que o fagan especialmente perigosos.
- certificado sanitario de esterilización se se efectuou a mesma
- memoria descrittiva das instalacións e medidas de seguridade utilizadas para impedir a fuxida dos animais conforme o art. 3.4 do Decreto 90/2002 no seu caso
- facturas e xustificante da adquisición

Os citados datos e no seu caso a documentación oportuna deberá facilitala o adquirente do animal no prazo de quince días a contar dende a súa tenencia efectiva.

2.- o certificado de sanidade animal deberá ser expedido polos Servicios Sanitarios da Comundade Autónoma de Galicia ou por un veterinario colexiado

3.- Para a renovación da licenzia municipal deberá aportarse a seguinte documentación:

- solicitude de renovación
- copia compulsada da renovación do seguro de responsabilidade civil
- copia compulsada do certificado médico de sanidade animal efectuado nunha data non anterior a dous meses á da renovación da licenzia
- certificado de capacidade física
- certificado de aptitude psicolóxica

## **ART. 8º - ÓRGANO COMPETENTE PARA A CONCESIÓN DAS LICENCIAS MUNICIPAIS**

1.- As licenzias municipais para a tenencia de animais potencialmente perigosos se concederán mediante resolución do órgano que teña atribuída a competencia en materia de licenzias previa acreditación da incorporación da documentación esixida na presente ordenanza.

## **ART. 9º - REVISIÓN, PERDA DE LICENCIAS E DEPÓSITO DE ANIMAIS**

1.- A perda de calquera dos requisitos esixidos no art. 4 desta ordenanza dará lugar a revisión das licenzias municipais concedidas e a súa retirada previa tramitación de expediente contradictorio.

2.- A retirada da licenzia dará lugar á perda do dereito á tenencia do animal e a obriga do interesado de proceder no prazo máximo de dez días a contar dende a recepción do requerimento a súa entrega e depósito no establecemento adecuado ó efecto ata a obtención da mesma, salvo que o animal sexa obxecto de entrega a outro propietario ou sacrificio nos termos establecidos nos arts. 58, 59, e 60 do Decreto 153/1998 da Comunidade Autónoma de Galicia.

3.- En caso de incumprimento a obriga de depósito procederase a súa execución subsidiaria polo Concello ou a Comunidade Autónoma a través dos seus servizos ou mediante empresa contratada sendo os gastos que tal actuación conleva a cargo do antigo titular da licenzia.

4.- O Concello poderá retirar dos espazos públicos e depositar de oficio en establecemento adecuado, sen necesidade de previo requerimento, a aqueles animais potencialmente perigosos nos que se aprecie unha situación de abandono ou perigosidade para os usuarios das vías ou espazos de uso común ou circulen por estes sen a debida protección ou control do seu propietario ou tenedor.

5.- Igualmente o Concello poderá retirar e depositar en establecemento adecuado aqueles animais potencialmente perigosos que non dispoñan da correspondente tarxeta de identificación no municipio de orixe ata tanto non se acredite tal circunstancia polo titular do mesmo.

6.- A falta de licenzia municipal para a tenencia de animais potencialmente perigosos dará lugar a un único requerimento municipal para a súa obtención no prazo de dez días e a retirada e depósito dos animais nos termos establecidos neste artigo.

## **CAPÍTULO III - DO REXISTRO MUNICIPAL**

### **ART.10 -REXISTRO MUNICIPAL DE ANIMAIS POTENCIALMENTE PERIGOSOS**

1.- Créase o Rexistro Municipal de Animais potencialmente perigosos, no que se fará constar con carácter obrigatorio a seguinte documentación:

- código identificador do animal
- zona de aplicación
- especie
- raza
- sexo
- descrición da capa
- data de nacemento do animal
- dirección habitual do animal
- outros signos identificatorios
- especificación de si o animal está destinado a convivir con seres humanos ou se teñen finalidades como a garda, defensa ou outra que se indique
- nome e apelidos do propietario do animal
- dirección do propietario do animal
- teléfonos de contacto do propietario do animal
- DNI do propietario do animal
- nome dirección, número de colexiado e número de veterinario colaborador que realice a marcaxe
- data na que se realiza a implantación da identificación e a entrega de documento ó propietario
- data de alta no rexistro
- certificado sanitario expedido por un veterinario que acredite con periodicidade anual a situación sanitaria do animal e a inexistencia de enfermidades ou síntomas que poidan facer potencialmente perigoso, así como unha certificación de que o animal carece de lesións ou cicatrices que poidesen estar relacionadas coa utilización do animal en pelexas ou outras actividades prohibidas.
- cartilla sanitaria actualizada nos tratamentos preceptivos e preventivos propios da especie e idade. Na cartilla sanitaria figurará a catalogación de animal potencialmente perigoso.
- copia da licenza municipal de tenencia de animais potencialmente perigosos a nome do propietario. Acompañarase de copia da póliza que xustifique ter formalizado o seguro de responsabilidade civil.
- datos do centro de adestramento se fora o caso
- incidentes de agresión se fora o caso

2.- Os propietarios dos animais serán os responsables de identifica-los animais e de sufraga-los gastos que esto ocasione, independentemente do lugar de residencia de ditas persoas. A identificación definitiva suporá un requisito previo e obrigatorio para realizar calquera transacción do animal.

3.- O rexistro municipal é un rexistro de carácter público ó que terán acceso as Administracións Públicas e autoridades competentes así como aquelas persoas físicas ou xurídicas que acrediten ter interese lexítimo no coñecemento de datos obrantes no mesmo. A estes efectos considerárase, en todo caso, interese lexítimo o que ostenta calquera persoa física ou xurídica que desexe adquirir un animal destas características, así como aquelas que sufriran calquera tipo de agresión polo animal e desexen exercer as accións correspondentes en calquera vía xurisdiccional, para o que deberán acreditar previamente a interposición da correspondente denuncia.

#### **ART. 11º.- INSCRICIÓN NO REXISTRO**

1.- A inscrición no Rexistro de Animais potencialmente perigosos efectuarase de oficio polo Concello trala concesión da licenza municipal regulada no art. 3º da presente ordenanza.

2.- Non obstante será igualmente obrigatoria a instancia do interesado, a inscrición no rexistro municipal, en sección aberta ó efecto, cando se efectúe o traslado dun animal potencialmente perigoso a este municipio, sexa con carácter permanente ou por un período superior a tres meses, debendo proceder a inscrición no prazo máximo de dez días a contar dende o inicio da residencia no municipio.

3.- Estimarase que se efectuou un traslado de animal potencialmente perigoso, salvo acreditación expresa en contrario polo interesado, nos casos de cambio de residencia do titular do mesmo en cuio caso será preciso a acreditación da obtención da licenza no municipio de orixe anterior, procedendo a renovación da licenza nos casos previstos na presente ordenanza.

4.- Das inscricións que se efectúen no Rexistro Municipal de animais potencialmente perigosos, darase traslado ó órgano competente da Comunidade Autónoma de Galicia.

5.- Igualmente nos casos de cambio de residencia dende o municipio sen prexuízo da obriga do interesado de dar conta do traslado do animal, notificárase ó Concello do municipio de nova residencia a titularidade por parte do interesado dun animal potencialmente perigoso.

#### **ART. 12º - BAIXA NO REXISTRO MUNICIPAL DE ANIMAIS POTENCIALMENTE PERIGOSOS.**

1.- A baixa no Rexistro Municipal de animais potencialmente perigosos efectuarase a instancia do interesado previa acreditación da venda, traspaso, cesión ou morte do animal.

2.- Igualmente procederase á baixa no rexistro no caso de traslado da residencia do titular do animal a municipio distinto e así quede acreditado xa sexa a instancia do interesado ou de oficio polo Concello

3.- Farase figurar no Rexistro como de titularidade municipal aqueles animais depositados nas súas instalacións como consecuencia de recollida dos mesmos na vía pública ou por perda da licenza do seu anterior titular.

#### **ART. 13º - SECCIÓN LOCAL DO REXISTRO GALEGO DE IDENTIFICACIÓN DE ANIMAIS DE COMPAÑÍA.**

1.- O abeiro dos principios de lealdade institucional, cooperación e colaboración previstos no art 4 da Lei 30 /1992, establécese unha sección local da sección do Rexistro de identificación de animais de compañía, limitada ós cans residentes no termo municipal, que formarase cos datos que ó efecto se remitan polo Rexistro Galego. Cos datos contidos na sección do rexistro formarase en data 31-12 de cada ano o censo ó que se refire o art, 27 do Decreto 153/1998.

2.- Neste rexistro farase constar a información contida no apartado 5 do art. 5 do Decreto 90/2002 de 28 de febreiro, da Comunidade Autónoma de Galicia e que se recollen tamen nas letras a) á s) do apartado 1 do art 10 da presente ordenanza.

#### **ART. 14º - CIRCULACIÓN E PERMANENCIA DO CAN EN VÍAS PÚBLICAS E LOCAIS.**

1.- Nas vías públicas e os espazos naturais protexidos os cans irán suxeitos con cadea ou correa.

2.- Os cans guía poderán circular libremente nos transportes públicos urbanos, sempre que vaian acompañados polo seu dono e cumpran as condicións hixienicas, sanitarias e de seguridade que prevén as ordenanzas.

3.- Queda expresamente prohibido a entrada ou estancia de animais domésticos en toda clase de locais destinados á fabricación, almacenamento, transporte venda ou manipulación de alimentos.

4.- Queda asemade prohibida a entrada ou estancia de animais domésticos en restaurante, bares, cafeterías e similares.

5.- Prohíbese a circulación ou a estancia de cans e outros animais nas piscinas públicas e locais de espectáculos públicos, deportivos e culturais e nos recintos escolares.

6.- Os titulares de estes locais deberán colocar na entrada dos establecementos e en lugar visible o sinal identificativa desta prohibición.

7.- Quedan exentos das prohibicións anteriores os cans guía que acompañen a persoas invidentes.

8.- Queda prohibido deixar as deposicións fecais dos cans nas vías públicas. Os propietarios de cans son responsables de recoller convenientemente os excrementos e depositalos ou ben en bolsas de basora domiciliaria ou ben naqueles lugares que a autoridade municipal destine expresamente a esta finalidade.

9.- Queda expresamente prohibido que os cans accedan ás zonas de xogo infantil das prazas e parques do municipio

10.- Prohíbese lavar animais na via pública e fontes así como darlles de beber auga amourados ás billas das fontes públicas.

11.- Conforme o establecido no art. 112 apartado 5 do Dec reto 90/2002 de 28 de febreiro da Comunidade Autónoma de Galicia, os cans catalogados como potencialmente perigosos terán que circular polas vías públicas e en lugares e espacios de uso público en xerl, atados con cadea ou correa non extensible de lonxitude non superior a dous metros, provistos da correspondente buceira homologada e adecuada para a súa raza e en ningun caso poderán ser conducidos por un menor de 16 anos.

## **CAPÍTULO IV - INFRACCIÓNS E SANCIÓN**

### **ART. 15º - INFRACCIÓNS**

1.- As infraccións que se cometan contra o disposto nesta ordenanza clasifícanse en moi graves, graves e leves.

2.- Terán a consideración de infracción administrativa moi graves, as previstas no art. 13.1 da Lei 50/1999 de 23 de decembro do Estado así como as establecidas no art. 21 da Lei 1/1993 de 13 de abril da Comunidade Autónoma de Galicia

3.- Terán a consideración de infraccións administrativas moi graves as previstas no art. 13.2 da Lei 50/1999 de 23 de decembro do Estado así como as establecidas no art. 21 da Lei 1/1993 de 13 de abril da Comunidade Autónoma de Galicia.

4.- Son infraccións administrativas leves o incumprimento de calquera das obrigas establecidas nesta ordenanza, na lei 50/1999 de 23 de decembro do Estado e na Lei 1/1993 de 13 de abril da Comunidade Autónoma de Galicia non comprendidas nos párrafos anteriores e cúa competencia corresponda ó Concello conforme o previsto no art. 20.3 a) do Decreto 90/2002 de 28 de febreiro da Comunidade Autónoma de Galicia e en particular os seguintes:

- a non presentación no prazo requerido da documentación complementaria esixida no art. 6,2 desta ordenanza
- a non renovación no prazo dun mes da licenza concedida para a tenencia de animais potencialmente perigosos.
- a non presentación cando lle sexa requerida da licenza do municipio de orixe de animais potencialmente perigosos polos propietarios non aveciñados neste municipio.

## **ART. 16º - SANCIONES**

1.- As infraccións tipificadas no art. Anterior serán sancionadas con multas cuíais contías serán as fixadas no art. 13.5 da lei 50/1999 do Estado e no art. 24 da Lei 1/1993 da Comunidade Autónoma de Galicia.

2.- En todo caso as infraccións graves e moi graves tipificadas no art. Anterior desta ordenanza poderán levar aparelladas como sancións accesorias a confiscación, decomiso, esterilización ou sacrificio dos animais potencialmente perigosos, a clausura do establecemento e a suspensión temporal ou definitiva da licenza para tenencia de animais potencialmente perigosos ou do certificado de capacitación do adestrador.

## **ART. 17º - RESPONSABLE**

1.- Considérase responsable das infraccións os que por acción ou omisión participaran na comisión das mesmas, ó propietario ou tecedor dos animais, ou no seu caso, ó titular do establecemento, local ou medio de transporte no que se produzan os feitos, e neste último suposto, asemade o encargado do transporte.

## **ART. 18º - PROCEDIMIENTO SANCIONADOR**

1.- O procedemento sancionador aplicable rexeráse polo establecido na Lei 50/1999 de 23 de decembro así como a Lei 30/92 de 26 de novembro e normas de desenvolvemento.

## **ART. 19º - EJERCICIO DA POTESTADE SANCIONADORA**

1.- Os órganos competentes para sancionar de acordo cos arts 24.2 da lei 1/1993 de 13 de abril da Comunidade Autónoma de Galicia serán:

- A) por infraccións leves, o Alcalde
- B) por infraccións graves, o Director Xeral de Conservación da Natureza da Consellería de Medio Ambiente
- C) por infraccións moi graves o Conselleiro de Medio Ambiente.

2.- A incoación e tramitación dos expedientes polas infraccións tipificadas como leves lle corresponde ó Concello

Non obstante o Alcalde poñerá en coñecemento de xeito fidedigno do Director Xeral de Conservación da Natureza da Consellería de Medio Ambiente, toda acción ou omisión que poida ser tipificada como infracción grave ou moi grave.

3.- Cando as circunstancias de perigo así o aconsellen o Alcalde poderá proceder á retirada e custodia dun animal potencialmente perigoso a cargo dun propietario como medida de carácter provisional durante a tramitación dun expediente sancionador.

## **DISPOSICIÓN ADICIONAL ÚNICA**

Quedan excluidos da obriga de obtención de licencia municipal aqueles exemplares caninos que foran obxecto de adestramento baixo a supervisión directa da ONCE e sexan destinados a guía de persoas invidentes.

## **DISPOSICIÓN FINAL**

A presente ordenanza entrará en vigor coa súa publicación íntegra no BOP continuando en vigor ata a súa derogación ou modificación posterior.